

Олимпийн Чуулганаар 2008 оны
12 дугаар сарын 13-нд
нэмэлт өөрчлөлт оруулан батлав.

МОНГОЛЫН ҮНДЭСНИЙ ОЛИМПИЙН ХОРООНЫ ДҮРЭМ

НЭГДҮГЭЭР БҮЛЭГ **НИЙТЛЭГ ҮНДЭСЛЭЛ**

Нэгдүгээр зүйл. Байгууллагын нэр, байршил

1.1. Байгууллагын нэр нь монголоор Монголын Үндэсний Олимпийн Хороо, товчлол нь “МҮОХ” (цаашид энэ дүрмэнд товчлолыг хэрэглэнэ), англиар Mongolian National Olympic Committee байна.

1.2. Байршил: Монгол улс, Улаанбаатар хот, Хан-Уул дүүрэг, Чингисийн өргөн чөлөө, Олимпийн хороо

1.3. Байгуулагдсан он, сар, өдөр: 1956 оны 02 дугаар сарын 26 -ны өдөр

Хоёрдугаар зүйл. Үйл ажиллагааны үндсэн зарчим

2.1. Олон Улсын Олимпийн Хартийг удирдлага болгож, олимпийн хөдөлгөөнийг үндэсний болон олон улсын хэмжээнд хөгжүүлэх зорилго бүхий Төрийн бус байгууллага юм.

2.2. Монгол Улсын Үндсэн Хууль, Төрийн бус байгууллагын тухай хууль, бусад хууль тогтоомжийг хүндэтгэн сахиж, өөрийн Дүрмийн хүрээнд төр, засгийн болон төрийн бус байгууллага, аж ахуйн нэгж, иргэдтэй хамтран ажиллана.

2.3. МҮОХ нь олимпийн хөдөлгөөнийг Монгол улсын нутаг дэвсгэрт бүрэн төлөөлөх эрх бүхий байгууллага юм.

2.4. МҮОХ нь олимпийн наадам, Олон Улсын Олимпийн Хорооны (цаашид ОУОХ гэж товчилно) ивээл дор зохиогддог бүс, тив, дэлхийн тэмцээнд Монгол улсыг төлөөлөх эрхийг Олимпийн Хартийн дагуу эдэлнэ.

2.5. МҮОХ нь Олимпийн Хартийг дагаж мөрдөх, бүрэн бие даасан байдлаа хамгаалахад саад тотгор учруулж болох аливаа хэлбэрийн дарамт шахалтыг няцаана.

2.6. Улс төр, шашин, бизнесийн аливаа дарамтыг эсэргүүцэж, тэдгээрээс бүрэн хараат бус байна.

2.7. Монгол улсад биеийн тамир, спортыг хөгжүүлэх төрийн бодлого, үзэл баримтлалыг хэрэгжүүлэхэд тал бүрийн дэмжлэг үзүүлнэ.

Гуравдугаар зүйл. Зорилго

3.1. Монгол улсад олимпийн хөдөлгөөнийг хөгжүүлэх, хамгаалах, сурталчилан дэлгэрүүлэх;

3.2. Монгол улсын нутаг дэвсгэрт Олимпийн хартийн хэрэгжилтэнд хяналт тавих;

3.3. Олимпийн үндэсний академи, олимпийн музей, олимпийн хөдөлгөөний соёл, боловсролын хөтөлбөрийг хэрэгжүүлж олон түмэнд түгээн дэлгэрүүлэх;

3.4. Спортын мэргэжилтэн, удирдах ажилтныг бэлтгэх, мэргэжлийг дээшлүүлэхэд анхаарах, спортын шинжлэх ухааны ололт амжилтыг нэвтрүүлэх;

3.5. Тамирчдын спортын амжилтыг дээшлүүлэх, бүх нийтийн спортыг дэмжин хөгжүүлэх;

3.6. Спортод ялгаварлан гадуурхах, хүчирхийлэх хэлбэрийг эсэргүүцэж, биеийн тамир, спортыг хөгжүүлэхэд саад учруулах аливаа сөрөг нөлөөллийн эсрэг идэвхитэй тэмцэх;

3.7. Дэлхийн допингийн эсрэг агентлагийн дүрмийг хүлээн зөвшөөрч, допингийн эсрэг тэмцэх, тамирчдын эрүүл мэндийг хамгаалах, допингийн эсрэг бодлого, дүрмийг хүндэтгэн сахих;

3.8. Спортын ёс зүйн олон улсын хэм хэмжээг сахих;

3.9. Үндэсний хэмжээнд энх тайван, спорт ба эмэгтэйчүүдийг дэмжих үйл ажиллагааг явуулах, хүрээлэн буй орчны асуудалд онцгой анхаарал хандуулах;

3.10. Спортын байгууллага, холбоодын үйл ажиллагаанд дэмжлэг туслалцаа үзүүлэх;

Дөрөвдүгээр зүйл. МҮОХ-ны эрх, үүрэг

4.1. Олимпийн Хартийн хүрээнд олимпийн хөдөлгөөний асуудлаар санал боловсруулах;

4.2. Олимпийн наадмыг зохион байгуулах хотын тухай саналаа ОУОХ-нд өгөх;

- 4.3. Олон Улсын Олимпийн Их хурал, үндэсний олимпийн хороодын Ерөнхий Ассамблейд бэлтгэж оролцох;
- 4.4. ОУОХ, түүний хүлээн зөвшөөрсөн байгууллагуудтай харилцах, хамтран ажиллах, туслалцаа авах;
- 4.5. Спортын холбоодын саналыг үндэслэн, тухайн спортоор бүс, тив, олимпийн наадамд оролцох баг тамирчдын асуудлыг шийдвэрлэх;
- 4.6. ОУОХ-ны урилгыг хүлээн авч, олимпийн наадамд баг тамирчдаа зохион байгуулан оролцуулах;
- 4.7. Олон улсын спортын болон үндэсний байгууллагуудтай Олимпийн Хартийн хүрээнд хамтран ажиллах;
- 4.8. МҮОХ-ны зорилгод нийцүүлэн спортын холбоодыг мэргэжил, арга зүйн удирдлагаар хангах;
- 4.9. Олимпийн эв санааны нэгдлийн хөтөлбөрт хамрагдах, туслалцаа авах;
- 4.10. Спортын маркетингийг хөгжүүлэх, санхүүгийн шинэ эх үүсвэр бий болгох, хандивлагчидтай хамтран ажиллах;
- 4.11. Олимпийн үзэл санааг дэлгэрүүлэн хөгжүүлэх, сургалт, сурталчилгааны ажлыг удирдан зохион байгуулах;
- 4.12. Олимп, тив, бүсийн наадамд оролцох тамирчдын эрүүл мэндийг даатгуулан, тэдний эрх ашгийг хамгаалах;
- 4.13. Олимпийн хөдөлгөөнд хувь нэмэр оруулсан хувь хүн, байгууллагыг МҮОХ-ны шагналаар шагнаж урамшуулах, төр, засгийн шагналд дэвшүүлэх;
- 4.14. Өөрийн оронд олимп, тив, бүсийн наадмыг зохион байгуулах тухай саналаа ОУОХ, Азийн олимпийн зөвлөл (цаашид АОЗ гэх), бүсийн холбоонд өгөх.

ХОЁРДУГААР БҮЛЭГ

МҮОХ-НЫ ГИШҮҮНЧЛЭЛ

Тавдугаар зүйл. Гишүүн байгууллага

- 5.1. Доорхи спортын холбоо нь МҮОХ-ны гишүүн байгууллага байна.
 - а. Олимпийн наадмын хөтөлбөрт ордог спортын холбоо
 - б. ОУОХ-гоор хүлээн зөвшөөрөгдсөн спортын холбоо
 - в. АОЗ-өөр хүлээн зөвшөөрөгдсөн спортын холбоо

г. МҮОХ-гоор хүлээн зөвшөөрөгдсөн бусад холбоо

5.2. Гишүүн холбоо нь дараахь нөхцөлийг заавал хангасан байна.

- Жил бүр улсын аварга шалгаруулах тэмцээн зохион байгуулах;
- МҮОХ-ны гишүүний татвар төлсөн байх;
- Жил бүрийн үйл ажиллагааны тайланг гарган өгөх.
- Тухайн спортын холбоо нь олон улсын холбооны гишүүн байх

5.3. Дүрмийн 5.2-т заасан нөхцөлийг 2 жилийн турш хангаагүй холбоо нь гишүүний эрхээ алдана. Ийм холбоо нь дүрмийн 5.4-т заасан нөхцөлийг хангасны дараа гишүүнчлэлээ сэргээж болно.

5.4. Холбоо нь дүрмийн 5.2-т заасан нөхцөлийг 2 жилийн хугацаанд хангасан тохиолдолд МҮОХ-гоор хүлээн зөвшөөрөгдөж гишүүнээр элсэнэ.

5.5 МҮОХ-ны орон нутгийн салбар хороод гишүүн байгууллага байна.

Зургаадугаар зүйл. МҮОХ-ны гишүүн

6.1. МҮОХ-ны гишүүд нь дараах хүмүүсээс бүрдэнэ.

- Гишүүн спортын холбоо тус бүрээс нэг гишүүн;
- МҮОХ-ны орон нутгийн салбар хорооны төлөөлөгч тус бүр нэг гишүүн;
- ОУОХ-ны гишүүн, хүндэт гишүүн;
- Сүүлийн 3 удаагийн олимпийн наадамд оролцсон тамирчдын төлөөлөгч 2 хүн;
- Олимпийн наадмын медальт тамирчдын төлөөлөгч 2 хүн;

6.2. МҮОХ-ны гишүүн нь тухайн гишүүн байгууллагын сонгуульт ажил, үүргээс огцрох эсвэл татгалзах тохиолдолд гишүүнээс шууд чөлөөлөгдсөнд тооцогдоно. Түүнийг чөлөөлөгдснөөс хойш 30 хоногийн дотор орны гишүүнээр сонгуулах хүний нэрийг МҮОХ-нд ирүүлнэ. Гишүүний асуудлыг Гүйцэтгэх зөвлөл хэлэлцэн, гишүүдийн хурлаар оруулж баталгаажуулна.

6.3. Спортын захиргааны байгууллагад ажиллаж буй хүмүүсээс бусад МҮОХ-ны гишүүд нь үүргийнхээ дагуу гүйцэтгэсэн ажлынхаа төлөө ямар нэгэн цалин хөлс авахгүй.

6.4 Засгийн газар болон Удирдах байгууллагаас ҮОХ-ны гишүүнийг томилж болохгүй.

ГУРАВДУГААР БҮЛЭГ

МҮОХ-НЫ УДИРДЛАГА, ЗОХИОН БАЙГУУЛАЛТ

Долоодугаар зүйл. МҮОХ-ны удирдлагын тогтолцоо

7.1. МҮОХ-ны удирдлагын тогтолцоо нь чуулган, гишүүдийн хурал, гүйцэтгэх зөвлөл, Ерөнхийлөгчөөс бүрдэнэ.

Наймдугаар зүйл. МҮОХ-ны чуулган

8.1. Монгол улсад олимпийн хөдөлгөөнийг удирдах дээд байгууллага нь Монголын Олимпийн Чуулган мөн. Чуулган нь 4 жил тутамд Зуны Олимпийн наадмын дараа хуралдана.

8.2. Олимпийн Чуулганыг хуралдуулах хугацааг 3 сараас доошгүй хугацааны өмнө МҮОХ-ны гишүүдийн хурлаас зарлана.

8.3. Олимпийн чуулганд МҮОХ-ны гишүүд, дүрмийн 5.1.а-д заасан гишүүн холбоодын нэг төлөөлөгч оролцоно.

8.4. Чуулганд нийт гишүүдийн 75-аас доошгүй хувь оролцсон тохиолдолд хурлыг хүчинтэйд тооцно. Сонгуулиас бусад шийдвэрийг хуралд оролцож байгаа гишүүдийн олонхийн саналаар гаргана.

8.5. Чуулганаар дараахь асуудлыг хэлэлцэнэ. Үүнд:

- Үйл ажиллагааны тайлан, хянан шалгах зөвлөлийн тайлан;
- Дүрэмд нэмэлт, өөрчлөлт оруулах;
- МҮОХ-ны ерөнхийлөгчийг сонгох;
- Гишүүдийг батламжлах;
- МҮОХ-ны гишүүдийн жил бүрийн хурлаар хэлэлцэх асуудлууд (энэхүү дүрмийн 9.3-т заасан)
- Бусад асуудал

8.6. МҮОХ-ны гишүүн байгууллагаас Ерөнхийлөгчид нэр дэвшүүлнэ. Саналыг чуулганаас нэг сарын өмнө МҮОХ-д ирүүлнэ.

8.7. Ерөнхийлөгчийн сонгуулийг нууц санал хураалтаар явуулна. Ерөнхийлөгчид нэр дэвшигч нийт саналын 50-иас дээш хувийг авсан тохиолдолд сонгогдсонд тооцогдоно. Хэрэв аль ч нэр дэвшигч 50-иас дээш хувийн санал аваагүй тохиолдолд хамгийн олон санал авсан хоёр нэр дэвшигчийг үлдээж дахин санал хурааж шийдвэрлэнэ.

8.8. Хэрэв чуулганаар олимпийн наадамтай холбоотой асуудал хэлэлцэгдэж байх үед санал зөрөлдвөл олимпийн хөтөлбөрт багтдаг спортын холбоодын саналыг илүү харгалзан үзнэ.

8.9. Нийт гишүүдийн 75-аас доошгүй хувь нь санал гаргасан тохиолдолд ээлжит бус чуулганыг хуралдуулж болно.

Есдүгээр зүйл. Гишүүдийн хурал

9.1. Гишүүдийн хурал нь жилд нэгээс доошгүй удаа хуралдана.

9.2. Хуралд нийт гишүүдийн 50-иас дээш хувь оролцсон тохиолдолд хүчинтэйд тооцно.

9.3. Гишүүдийн хурлаар дараахь асуудлыг хэлэцэнэ. Үүнд:

- Үйл ажиллагааны тайлан;
- Үйл ажиллагааны төлөвлөгөө батлах;
- Санхүүгийн тайлан
- Шинэ гишүүн ба байгууллагыг батламжлах; Олимпын чуулганы товыг тогтоох (зөвхөн чуулганы өмнөх хурлаар);
- Гүйцэтгэх зөвлөлийн гишүүдийг сонгох (зөвхөн чуулгантай жилийн хурлаар);
- Гүйцэтгэх зөвлөлийн гишүүдийг нөхөн сонгох (дүрмийн 10.5-г баримтална);
- Бусад асуудал.

9.4. Шаардлагатай тохиолдолд ээлжит бус хурлыг бүх гишүүдийн 2/3-оос доошгүй хувийн саналаар зарлан хуралдуулж болно.

Аравдугаар зүйл. Гүйцэтгэх зөвлөл

10.1. Гүйцэтгэх зөвлөл нь гишүүдийн хурлын хоорондох үйл ажиллагааг удирдан зохион байгуулна.

10.2. Гишүүдийн хурлаар гүйцэтгэх зөвлөлийг дараахь 11 хүний бүрэлдэхүүнтэй байгуулна.

Үүнд:

- Ерөнхийлөгч
- Дэд ерөнхийлөгч 4 хүн
- Гүйцэтгэх зөвлөлийн гишүүн 6 хүн

10.3. МҮОХ-ны гишүүн байгууллагаас гүйцэтгэх зөвлөлийн гишүүнд нэр дэвшүүлнэ. Саналыг чуулганаас нэг сарын өмнө МҮОХ-д ирүүлнэ.

10.4. Гүйцэтгэх зөвлөлийг гишүүдийн хурлаас 4 жилийн хугацаагаар сонгоно. Гишүүдэд хамгийн олон санал авсан нэр дэвшигчид сонгогдоно.

10.5. Гүйцэтгэх Зөвлөлийн гишүүдийн сонгуулийг нууц санал хураалтаар явуулна. Олимпын наадмын хөтөлбөрт багтах спортын төрлүүдийг эрхлэх холбоод,

тэдгээрийн төлөөлөгчид ҮОХ болон түүний гүйцэтгэх байгууллагын санал хураалтанд оролцогчдын олонхийг бүрдүүлнэ.

10.6. Ерөнхийлөгч нь тэргүүн дэд, дэд ерөнхийлөгчийг гишүүдийн хурлаар санал оруулж сонгуулна.

10.7. Гүйцэтгэх зөвлөлийн хуралд гишүүдийн 50-иас дээш хувь оролцсон тохиолдолд хүчинтэйд тооцно. Шийдвэрийг хуралд оролцож байгаа гишүүдийн олонхийн саналаар гаргана.

10.8. Гүйцэтгэх зөвлөл МҮОХ-ны байнгын ажлын албаны орон тоо, бүтцийг төсвийн дагуу батална.

10.9. Гишүүдээс бүрдсэн байнгын комисс, ажлын хэсэг байгуулан чиг үүргийг батална.

10.10 Гүйцэтгэх зөвлөлийн гишүүн дүрмийн 6.2-н дагуу МҮОХ-ны болон Гүйцэтгэх зөвлөлийн гишүүнээс чөлөөлөгдвөл орны хүнийг гүйцэтгэх зөвлөлийн гишүүнд гишүүдийн хурлаар дүрмийн 10.3, 10.5-н дагуу нөхөн сонгоно. МҮОХ-ны гишүүнчлэлийн хувьд төлөөлөх холбоо нь дүрмийн 6.2-н дагуу орны хүний нэрийг дэвшүүлж батлуулна.

Арваннэгдүгээр зүйл. Ерөнхийлөгч

11.1. МҮОХ-ны Ерөнхийлөгчийг Олимпийн чуулганы төлөөлөгчдөөс нэр дэвшүүлж нууцаар санал хурааж Олимпийн чуулганаас 4 жилийн хугацаагаар сонгоно. Ерөнхийлөгч орон тооны байна.

11.2. МҮОХ-ны Ерөнхийлөгч дараах эрхтэй.

- Ерөнхий нарийн бичгийн даргаар томилох хүний талаарх саналыг гүйцэтгэх зөвлөлийн хуралд оруулж, батлуулах;
- Бүрэн эрхийн хүрээнд шийдвэр гаргах;
- Чуулган, гишүүдийн хурал, гүйцэтгэх зөвлөлийн үйл ажиллагаа, түүний хуралдааныг удирдах;
- МҮОХ-г гадаад, дотоодод төлөөлөх.

11.3. Хэрвээ Ерөнхийлөгч албан үүргээ гүйцэтгэх боломжгүй болсон тохиолдолд (огцорсон, хүсэлтээрээ чөлөөлөгдсөн, эрүүл мэндийн байдлаас цаашид ажиллах боломжгүй болсон, нас нөгчсөн) тэргүүн дэд ерөнхийлөгч нь Ерөнхийлөгчийн бүрэн эрхийг хэрэгжүүлнэ.

Арванхоёрдугаар зүйл. Ерөнхий нарийн бичгийн дарга

12.1 Ерөнхийлөгчийн саналын дагуу Ерөнхий нарийн бичгийн даргыг гүйцэтгэх зөвлөлийн хурлаас томилох эсвэл чөлөөлнө

12.2. Ерөнхий нарийн бичгийн дарга нь МҮОХ-ны өдөр тутмын үйл ажиллагааг удирдан ажиллах орон тооны ажилтан байна.

12.3. Ерөнхийлөгч өөрийн эрх мэдлийг бүхэлдээ эсвэл тодорхой хэмжээгээр төлөөлүүлэн хэрэгжүүлэхийг Гүйцэтгэх Зөвлөлөөр шийдвэрлүүлнэ.

12.4. МҮОХ-ны чуулган, гишүүдийн хурал, гүйцэтгэх зөвлөлийн хурлын шийдвэрийг хангуулах, бэлтгэл ажил, бичиг баримт, ажлын тайлан бэлтгэх, комиссуудын үйл ажиллагаа явуулах нөхцөлийг бүрдүүлнэ.

12.5. Гишүүдтэй ажиллах, мэдээллээр хангах, гүйцэтгэх зөвлөлийн хуралд таслах эрхгүйгээр оролцоно.

Арвангуравдугаар зүйл. Хянан шалгах зөвлөл

13.1. Хянан шалгах зөвлөлийг (цаашид ХШЗ гэж товчилно) 5 хүний бүрэлдэхүүнтэйгээр МҮОХ-ны чуулганы төлөөлөгчдөөс нэр дэвшүүлж чуулганаас дөрвөн жилийн бүрэн эрхийн хугацаатай сонгоно.

13.2. ХШЗ нь бүрэлдэхүүнээсээ даргаа сонгоно.

13.3. ХШЗ дараахь үйл ажиллагаанд хяналт тавьж ажиллана. Үүнд:

- МҮОХ-ны дүрмийн биелэлт;
- Ерөнхийлөгчийн болон гүйцэтгэх зөвлөлийн шийдвэр нь МҮОХ-ны дүрэм, хууль тогтоомжид нийцэж байгаа эсэх;
- МҮОХ-ны ажлын алба, ерөнхий нарийн бичгийн даргын үйл ажиллагаа, харьяа байгууллага, архив, бичиг хэрэг, санхүү
- Спортын холбоодын үйл ажиллагаа

13.4. ХШЗ нь шалгалтын дүнг гүйцэтгэх зөвлөл, гишүүдийн хуралд танилцуулна.

Арвандөрөвдүгээр зүйл. Төр засгийн байгууллагатай харилцах

14.1 Үндэсний Олимпийн Хороо нь биеийн тамир, спортыг хөгжүүлэх асуудлаар санал боловсруулж, төр, засгийн байгууллагад өргөн барих, яам, газруудтай хамтран ажиллах

14.2 Монгол улсын хуулийн дагуу Олимпийн хөдөлгөөн, түүний үйл ажиллагаанд холбогдох асуудлаар Монголын төр, засгийн газартай харилцах, биеийн тамир,

спортын талаар гаргасан шийдвэр, даалгаварыг Олимпийн Харти, МҮОХ-ний дүрмийн хүрээнд хүндэтгэн биелүүлэх

14.3 Монгол улсын засгийн газраас Биеийн тамир, спортыг хөгжүүлэх бодлогыг хэрэгжүүлэх зарим чиг үүргийг гэрээний үндсэн дээр эрхлэн гүйцэтгэх, шаардагдах хөрөнгийг улсаас авч зарцуулах, Засгийн газарт эргэж тайлагнах болно.

14.4 Спортын эрдэм шинжилгээ судалгааны ажлыг хөгжүүлж, үр дүнг сургалт дасгалжуулалтад нэвтрүүлэхэд дэмжлэг үзүүлэх

14.5 Аймаг, нийслэлийн биеийн тамир, спортын байгууллагад мэргэжлийн заавар, зөвлөгөө өгөх

Арвантавдугаар зүйл. Спортын холбоо

15.1. Гишүүн холбоо нь МҮОХ-ны дүрмийг хүлээн зөвшөөрч, өөрийн дүрмийн хүрээнд үйл ажиллагаа явуулах төрийн бус байгууллага мөн.

15.2. МҮОХ нь Олимпийн Хартийн дагуу нэг төрлийн спортын нэг холбоог хүлээн зөвшөөрнө.

15.3. Спортын холбоо нь МҮОХ-ны батламжаар тивийн болон ОУСХ-нд элсэх ба бүс, тив, олимпийн наадамд тамирчдаа оролцуулна.

15.4. Спортын холбоо нь төв, орон нутагт өөрийн салбартай байж, спорт клуб, секцийг мэргэжлийн удирдлагаар хангаж туслалцаа үзүүлнэ.

15.5. Спортын холбоо, клуб нь ивээн тэтгэгч байгууллагын дэмжлэг авч болно.

15.6. Гүйцэтгэх зөвлөл нь спортын холбоодын үйл ажиллагааг уялдуулах зорилгоор спортын холбоодын зөвлөлийг байгуулан хамтран ажиллана.

Арванзургадугаар зүйл. Орон нутгийн салбар хороо

16.1. МҮОХ нь Монгол улсын нутаг дэвсгэрийн нэгжийн зохион байгуулалтын дагуу өөрийн салбар хороог байгуулна.

16.2. Салбар хороог орон нутаг дахь спортын холбоодын салбар зөвлөлүүдийн нэгдсэн хурлаас МҮОХ-ны гишүүнчлэлийн бүтцийн дагуу удирдлага, үйл ажиллагаагаа зохион байгуулна.

16.3. Салбар хороо нь тухайн орон нутаг дахь МҮОХ-ны бодлогыг хэрэгжүүлэх байгууллага юм.

16.4. Аймаг, дүүргийн салбар хороо тус бүр нэг төлөөлөгчийг сонгон МҮОХ-ны гишүүдийн бүрэлдэхүүнд оруулна.

ДӨРӨВДҮГЭЭР БҮЛЭГ

ХӨРӨНГӨ САНХҮҮ, ОНЦЛОГ

Арвандолоодугаар зүйл. Хөрөнгө, санхүү

17.1. МҮОХ-ны хөрөнгө, санхүү дараахь эх үүсвэрээс бүрдэнэ.

- ОУОХ, гадаад, дотоодын байгууллага хүмүүсээс МҮОХ-нд хандивласан техник тоног төхөөрөмж, хэрэглэл материал, эд агуурс, үндэсний болон гадаад валют;
- Спортын үйл ажиллагаанд зориулж байгууллага, иргэдээс МҮОХ-нд эзэмшүүлсэн барилга байгууламж, хөрөнгө оруулалт;
- Спортын маркетинг, мөнгөн хонжворт сугалаа, дүрмийн зорилгоо хэрэгжүүлэхтэй холбогдсон аж ахуйн үйл ажиллагаанаас орсон орлого, бусад орлого;
- Үйл ажиллагааны явцад бүрдсэн архивын материал, олон улсын спортын байгууллагын баримт бичиг;
- ҮОХ-ны гишүүн болон хүлээн зөвшөөрөгдсөн байгууллагын элсэлтийн ба жилийн татвар;
- Бусад орлого.

17.2. ҮОХ-ны хөрөнгө санхүүг олимпийн үзэл санаа, спортыг хөгжүүлэх үйл ажиллагаанд зориулна.

17.3. МҮОХ нь өөрийн хөрөнгийг эзэмших, ашиглах, захиран зарцуулах эрхтэй.

17.4. МҮОХ нь дэргэдээ зохих байгууллагыг Төрийн бус байгууллагын хуульд нийцүүлэн ажиллуулж болно.

Арваннаймдугаар зүйл. Онцлох зүйл

18.1. МҮОХ-ны бэлгэдэл нь олимпийн таван өнгийн цагаригийн дээд талд гал, нар, сарыг дүрслэн дээдэлсэн байна.

18.2. МҮОХ-ны туг нь бэлгэдлийг гурван талдаа шар цацагтай 1:2 хэмжээний цагаан даавуун дээр байрлуулж “Монголын Үндэсний Олимпийн Хороо” гэсэн бичээстэй байна.

18.3. МҮОХ-ны бэлгэдлийг хэрэглэх журмыг Гүйцэтгэх Зөвлөлийн хурлаар тогтоон хэрэгжүүлнэ.

18.4. МҮОХ нь албан бичгийн хуудас, тэмдэг хэрэглэнэ.

18.5. МҮОХ нь өөрийн хэвлэл, шагналтай байна.

Арванесдүгээр зүйл. Маргаан шийдвэрлэх

19.1. Маргаантай асуудлыг Олимпийн харти, Азийн Олимпийн зөвлөлийн дүрэм, Монгол улсын хууль тогтоомжийн дагуу шийдвэрлэнэ.

19.2. Олимпийн харти болон энэхүү дүрмийн хооронд зөрүүтэй зүйл гарвал Олимпийн хартийг баримтална.

19.3. Маргааныг эцэслэн шийдвэрлэх газар нь Швейцарь улсын Лозанн хотод байрлах Спортын арбитрын шүүх байна.

19.4 МҮОХ-ны Дүрмийн өөрчлөлт, нэмэлтийг ОУОХ-ны гүйцэтгэх зөвлөлөөр оруулж батлуулна.

МОНГОЛЫН ҮНДЭСНИЙ ОЛИМПИЙН ХОРОО